

Visoki predstavnik Inzko obratio se Vijeću sigurnosti UN-a



Još ima vremena da vladajuće stranke u Bosni i Hercegovini naprave zaokret prije oktobarskih izbora 2014. godine, rekao je visoki predstavnik Valentin Inzko u svom današnjem obraćanju pred Vijećem sigurnosti UN-a, ali je upozorio da „vrijeme ističe“.

Neuspjeh političkih lidera da do danas postignu dogovor i poduzmu odgovarajuće mjere kako bi riješili pitanje vojne imovine i pitanje presude Sejdić-Finci Evropskog suda za ljudska prava, blokirao je put BiH ka članstvu u NATO-u i EU, rekao je visoki predstavnik.

Naglasio je da ustavne promjene koje zahtijeva presuda Sejdić-Finci nisu samo uslov za daljnji napredak BiH ka članstvu u EU nego je provođenje presude i „test sposobnosti BiH da primijeni temeljne standarde ljudskih prava.“

Prezentirajući svoj izvještaj za period od 20. aprila do 21. oktobra, visoki predstavnik je naveo neadekvatnosti u okviru rukovodeće strukture u Federaciji, osporavanja suvereniteta BiH koja dolaze od političara iz Republike Srpske i neuspjeh institucija da osiguraju provođenje presuda Ustavnog suda BiH kao dokaze još uvijek neriješenih problema u BiH.

On je upozorio i na „generalno nepostojanje osjećaja urgentnosti“ među stranačkim liderima i rekao kako su protesti građana artikulirali „suštinsko nezadovoljstvo“ građana širom

zemlje. „Građani su shvatili nešto što mnogi lideri u Bosni i Hercegovini još uvijek nisu: demokratija nije nešto što se dešava tek svake četiri godine na izborima.“

Visoki predstavnik naglasio je vitalnu ulogu vojnih misija EU i NATO-a u Bosni i Hercegovini koje građanima potvrđuju da je zemlja sigurna, te je pozdravio daljnji angažman misija EUFOR-a i NATO-a sa izvršnim mandatom.

Izrazio je svoje apsolutno uvjerenje da „Bosna i Hercegovina, njeni lideri i njeni građani još uvijek imaju bezbroj šansi da zajednički djeluju, da uspiju i da prosperiraju“ i pozvao je međunarodnu zajednicu da „pruži podršku svim onim snagama u Bosni i Hercegovini koje su spremne da pomognu ovoj zemlji da postigne napredak i da se suprotstavi onima koji bi zemlju vodili unazad ka daljnjim podjelama i dezintegraciji.“

Kompletan tekst obraćanja visokog predstavnika pred Vijećem sigurnosti UN-a možete naći na [sljedećem linku](#).